

【经文信息】大正藏第 11 册 No. 0311 大方广三戒经

## 大方广三戒经 3 卷

[卷上](#)

[卷中](#)

[卷下](#)

No. 311 [No. 310(1)]

### 大方广三戒经卷上

北凉天竺三藏昙无讖译

如是我闻：

一时佛住王舍城祇阁崛山，而是山王高峻广博持众杂谷，犹如大地生杂种华，紧那罗、干闥婆众常所游止，有种种诸众：天龙、夜叉、罗刹、毘舍遮，止住其中；多种杂类，所谓：师子、虎豹、象马、骐驎、熊罴、麀鹿、青牛、水牛、羖羝、猕猴，是等众兽止住其中；有无量众鸟，所谓：孔雀、鸚鵡、鸚鵒、命命、鸕[只\*鸟]、鳧鴈、鸳鸯、鹅鸭、黑鴈、山鸡、鷓鴣、乌雉、鸠鸽、雕鹗、雀、遮沙，如是众鸟依止而住。是诸众生以佛力故，不为贪欲、瞋、痴所恼，不相茹食，共相亲爱如母如子。是时山王中，稠林鬱茂，枝条无折，多众杂树：天木树、毕利叉树、马耳树、毕钵罗树、紧祝加树、呵梨勒树、呵摩勒树、毘酰勒树、多罗树、迦尼迦树、庵婆罗树、阎浮树、木[廿/爪]、蒲桃、桃杏、梨[木\*奈]、婆隆伽树、胡桃、安石留、镇头迦树、尼驹罗树、松栢、豫樟、波奢树、勛陆、栴檀、沈水、苏合，是等诸树无不备有。是山王中，水陆众华悉皆具足，谓：阿提目多华、瞻婆华、波咤罗华、婆师华、须曼华、修干陀华、由提迦华、迦膩迦华、牛蕨、百叶、曼殊沙华，是等众华遍布其地，光饰山王。又有水华，青黄赤白杂色莲华，皆悉具足。是山王中，常于夜半兴起大云，天龙微云，降于八味细微香雨。一[谷-禾+牛]牛顷，此雨着润祇阁崛山，后夜清明无诸云翳，微风清凉悦适身心。是山王中所住众生，及诸草木充润光泽，犹如华鬘以水洒之，光色鲜净遂倍增胜。祇阁崛山生柔软草，色香味具，青缥右旋，众杂妙色，如孔雀项，其香犹如婆师罗华，其触犹如迦陵迦衣，其地柔软，下足之时，足陷四

指，举足还复。是山王中多诸池流，清冷水满，生诸莲华，青黄赤白红紫等色，大如车轮。若取华时，香气普熏满一由旬。是山王顶，出生大妙莲华之座——无降伏宝青琉璃为茎，阎浮檀金为叶。坚黑栴檀为台，马瑙宝王以为其须，纵广如海，百亿阿修罗王常所执持，百亿杂色宝王网以覆其上，百亿龙王雨妙香雨，百亿金翅鸟王口衔繒彩，百亿紧那罗王欢喜瞻察，百亿摩睺罗王而观视之，百亿干闥婆王歌咏赞叹，百亿天王雨末香衣服雨、香华鬘幢幡盖雨，百亿梵王在上空中合掌而侍，百亿净居天众合掌礼敬，百亿转轮人王七宝侍从来至其所，百亿海王从大海出而敬礼之，百亿大珠宝王以为照明，百亿净摩尼宝王以间错之，百亿遍悦宝王为华子实，百亿光明德宝王以为照明，百亿杂色摩尼宝王以为照明，阎浮幢宝王为善安持，百亿金刚师子宝王不坏庄严，百亿日藏宝王以杂庄严，百亿杂色不可思议宝王出杂种色，百亿如意宝王出无尽庄严——是大莲华，从于如来出世善根之所出生，菩萨志意之所护持遍现诸方，从如幻法出善法业生，从无净法眼之所庄严如梦法生，从无行起，从无碍道来，充遍满于十方法界，是佛境界功德所致。若于无量阿僧祇劫，叹其功德不可穷尽。

尔时世尊，于是华上结加趺坐，与大比丘众八千人俱，其名曰：阿若憍陈如、大德曷尸波阇、大德婆宾、大德摩诃男、大德优陀耶、大德耶奢、大德富那、大德无垢、大德憍梵钵提、大德善臂、大德优楼频螺迦叶、伽耶迦叶、那提迦叶、摩诃迦叶、大德迦梅延、大德舍利弗、大德大目干连，大德阿那律、须菩提、离波多、富娄那弥多罗尼子、优波离、罗睺罗、难陀，大德阿难等。如是上首八千人俱，悉皆谛了如实之性，观察实际，度于法性，度诸有海，行于如来虚空之行，结缚永断，无巢窟碍，行空寂静，永断疑网，信佛智海，度到彼岸，益利世间，作不请友，欲护一切所有众生，慈心不舍一切众生，善能演出一切佛行，守护佛法，誓护佛法，善趣佛种，向一切智。

复有菩萨摩訶萨八千人俱，普贤菩萨、文殊师利等而为上首，无上智菩萨、无上宝智菩萨、无碍智菩萨、华上智菩萨、日上智菩萨、月上智菩萨、无垢上智菩萨、金刚智菩萨、远尘智菩萨、遍说智菩萨、光幢菩萨、山幢菩萨、宝幢菩萨、无碍幢菩萨、华幢菩萨、净幢菩萨、日幢菩萨、欲乐幢菩萨、离垢幢菩萨、遍悦幢菩萨、地威德菩萨、宝威德菩萨、大威德菩萨、金刚智威德菩萨、无垢威德菩萨、日威德菩萨、月威德菩萨、山威德菩萨、智照威德菩萨、遍威德菩萨、地藏菩萨、虚空藏菩萨、莲华藏菩萨、宝藏菩萨、日藏菩萨、净德藏菩萨、法海藏菩萨、遍悦藏菩萨、船藏菩萨、莲华德藏菩萨、

日眼菩萨、净眼菩萨、无垢眼菩萨、无碍眼菩萨、遍见眼菩萨、善利智眼菩萨、金刚眼菩萨、宝眼菩萨、虚空眼菩萨、普眼菩萨、天冠菩萨、照法界志冠菩萨、道场珠冠菩萨、悦诸方冠菩萨、一切佛现在藏冠菩萨、超一切世间冠菩萨、遍悦一切冠菩萨、无毁冠菩萨、覆一切如来师子座冠菩萨、照一切法界虚空冠菩萨、龙主髻菩萨、梵主髻菩萨、离一切佛法慢髻菩萨、道场髻菩萨、出一切愿海音珠髻菩萨、放一切如来光场珠髻菩萨、一切虚空无坏语宝髻菩萨、诸佛神通遍照幢宝珠网覆髻菩萨、出一切如来法论声髻菩萨、出一切三世名声髻菩萨、大光菩萨、净光菩萨、宝光菩萨、离垢光菩萨、月光菩萨、法光菩萨、寂光菩萨、日光菩萨、神通光菩萨、天光菩萨、德相菩萨、智相菩萨、法相菩萨、无坏相菩萨、光相菩萨、华相菩萨、珠相菩萨、佛相菩萨、梵相菩萨、遍超相菩萨、梵音菩萨、海音菩萨、地音菩萨、世音菩萨、石山音菩萨、遍法界音菩萨、出一切法海雷音菩萨、摧一切魔场音菩萨、出大悲道雷音菩萨、灭一切世苦恼音菩萨、法勇菩萨、增勇菩萨、智勇菩萨、德山勇菩萨、德增勇菩萨、名称勇菩萨、普照勇菩萨、大慈勇菩萨、智照勇菩萨、如来种性勇菩萨、光德菩萨、胜德菩萨、法勇德菩萨、遍光德菩萨、法德菩萨、月德菩萨、虚空德菩萨、宝德菩萨、相德菩萨、智德菩萨、婆罗王德菩萨、法主王菩萨、世主王菩萨、梵主王菩萨、石山主王菩萨、众主王菩萨、天主王菩萨、寂主王菩萨、不动主王菩萨、化主王菩萨、菩提胜主王菩萨、寂声菩萨、无碍声菩萨、地声菩萨、大海声菩萨、雷声菩萨、照法声菩萨、虚空声菩萨、一切声菩萨、善眼雷声菩萨、发本愿声菩萨、灭一切魔场觉菩萨、智山觉菩萨、虚空觉菩萨、无碍觉菩萨、寤音觉菩萨、照三世觉菩萨、宝觉菩萨、无畏觉菩萨、遍照觉菩萨、法界眼照觉菩萨，如是等菩萨摩訶萨八千人俱，悉皆具足普贤愿行，所行无碍，遍诸佛刹现无量身，悉能往至一切佛所；眼界清静，所见无量，悉能现佛；一切神通所缘无量，一切如来有成佛处，悉往其所无有疲倦；智光普照一切法海，无量亿劫叹德叵尽；乐说清静量同虚空，智行清静无所依倚，随众所乐而为现形，无有障碍，解无众生，无我等界，慧如虚空，如智光网，普照一切所有法界；其心毕竟，寂静无乱，一切陀罗尼智种境界，三昧无畏所往无碍，住于法界百亿眼目，行一切法得无所畏，观无量智海，禅波罗蜜到于彼岸，得般若波罗蜜、神通波罗蜜，过诸世间三昧波罗蜜，善得自在。

复有五百比丘尼，其名曰摩诃波阁波提比丘尼、安隐比丘尼、莲华比丘尼、极苦瞿昙弥比丘尼、罗睺罗母耶输陀罗比丘尼，是等上首五百比丘尼俱。

复有五百优婆塞，其名曰：善威德优婆塞、天威德优婆塞、慧光优婆塞、名称威德优婆塞、过名称威德优婆塞、善志优婆塞、月德优婆塞、月欢喜优婆塞、大欢喜优婆塞、罗睺跋陀优婆塞、大贤优婆塞，如是上首五百优婆塞。

复有五百优婆斯、大光优婆斯、善光优婆斯、善身优婆斯、可乐身优婆斯、贤优婆斯、贤德优婆斯、月光优婆斯、相光优婆斯、德光优婆斯、善眼优婆斯，是等上首五百优婆斯。及余天、龙、夜叉、干闥婆、阿修罗、迦楼罗、紧那罗、摩睺罗伽等，恭敬围遶于佛世尊。

尔时世尊而演说法，名曰三戒，广分别说一切诸佛如来境界、菩萨所行，能悉普照一切法界，明照一切诸法界场，入净庄严一切法界，摧灭一切诸外道等、降诸魔怨，普悦一切诸众生界，能知一切诸众生等迷惑之心，随众生心而为演说，善能照了转众生根而为显示。

是时大德摩诃迦叶，从座而起，整衣服，偏袒右肩，右膝着地，合掌向佛，白佛言：「世尊！若诸众生求于佛法、力、无所畏，如是等人当集何法？当以何法护是众生？当以何法令不退转无上正道？」

如是请已，佛告迦叶：「善哉，善哉！迦叶！汝今所问，多所安乐安隐世间、利益天人，乃能问佛如是之事。迦叶！汝今谛听，善思念之！吾当为汝分别解说。」

大德迦叶及诸大众，受教而听。

佛告迦叶：「若有众生求佛智慧、佛力、无畏，迦叶！是等众生于一切法，应无所得，无所依倚，生诸善根。迦叶！若有菩萨求于无上正真道时，若有相着，或于佛法起有为相，或于佛法起无为相，或于佛法而起妄相，自作是相我知佛法，于是相中坚执不舍，当说是人不名为向于无上道。何以故？悵欲佛法则为着我，当作是修。若数执我则不能断；若不能断则有悵望，所悵望处乃悵望法，便为所害；若为所害，便起驰骋；若起驰骋，则有流转；若已流转，则有贯穿；若已贯穿，则有妄想；若已妄想，则有分别；若已分别，增益妄想；若增妄想，则有思觉；若已思觉，则有坚着；若已坚着，则有随逐；若有随逐，则有迷惑；若已迷惑，则便为失。云何为失？谓失安隐。云何安隐？谓无分别。若起分别，则便有常；若已有常，则有对碍；若有对碍，则便有住；若已有住，则有相续；若已相续，则有相违；若已相违，则重相违；若重相违，则有虚错；若已虚错，则有狂乱；若已狂乱，则

有虚诳；若已虚诳，则有烦恼；若已烦恼，则有悔恨；若已悔恨，则有所害，善不善法，随所爱着。然实无有定法可着，但以想转，为想所缚，是名想缚。贪无定处，瞋无定处，痴无定处，起于妄想分别之心，不能度得无上正道。迦叶！是名爱处。何故名之为爱处？无有定法名之为爱，无可爱法，无可爱处，但坚着爱，唯空坚着，谓坚着我，坚着众生，坚着净不净。迦叶！一切法空妄想为物，若无物物想，则以菩提为物，若以菩提为物，则是我想。若有我想，是则不名为菩萨也！何故名之为我想也？虽有所想，想无所得；想无所得，名为我想。是故不真实句，名为我想。若众生实，则菩提实。云何为菩提？谓见诸法皆悉如幻。云何如幻？谓不说我想、命想、众生想。若有无想在于心者，是人则着想及非想；若着想非想，是则狂醉；若已狂醉，则为一切实苦所迫；若为一切实苦所迫，如来说名为住狂谄。何以名谄？住于狂乱，有妄思惟；若妄思惟，则有我我所；若有我我所，则有言说；若有言说，如来说名为无言说，彼为言说言说所持，是故说言一切诸法从思惟有，悉是我实。

「迦叶！犹如空中有云聚起，而是云聚不从东西南北四维上下而来。如来实说不从十方所而来，解如是已，如实而说，随义演说，相应实说。而是云聚则非是聚，说名云聚。何故说名云聚也？起众杂色，种种杂色从虚妄起，是中无定名为云雾。见云雾起，虽见云雾无有定想，是中毕竟无云雾实。

「迦叶！犹如有人语余人言：『相与共往至荫处坐。』智慧之人作如是言：『我今不往。』是人答言：『不说有我，但说有荫。智者有言：「汝若说荫，则为非荫。」』」

「迦叶！汝观是人，于少言说尚不系着。如是，迦叶！若解如来法性道者，于大众中正师子吼。迦叶！如来尚欲于不善法行于善法，若世众生有我想者，于如来所是第一义。何以故？如来解如是我想者则为非想，余小凡夫不知如来随宜所说，与如来诤。是故我说世间与我诤，我不与世间诤。云何世间？世间者名曰众生。云何名为众生世间？如来了知世间如如，是故名曰众生世间。诸凡夫等自生是知：『是生、是灭』，互相残害。是彼言说欲得出世。何以故？此得大闇，住着世故。若住着世，则便有贪，若贪则瞋，若瞋则痴，若痴则有诤，若诤则相违。与谁相违？谓与如来及声闻僧。若相违则贪，若其有贪则重相违，若重相违便取于有，若取于有则便求有，若已求有便不知足，若不知足则便多作，若已多作便有多欲，若有多欲则住欲界色无色界，若住三界则便执着，若已执着则无逆流，若无逆流则常受死，若常受

死不至涅槃，若不至涅槃至回至处，至回至处谓至地狱。如是，迦叶！修行不吉名为不修，若不正修则有瞋恚，若有瞋恚则无推求，若不推求则不识我想，若不识我想则同一聚，同为一物谓我我所。云何名我？执着不实，作种种妄想，造作诸业。若作种种妄想，造作诸业，则着于我。云何我所？无有智故名为我所。又是身者，诸物和合名之为身，名戒聚果。以瞋恚心轻于他人，以瞋恚故，生于我慢，如聚生谷摄受守护，是名我所。若有我所则有狂惑，若有狂惑则便有痴，若已有痴便有诽谤，若有诽谤则便有瞋，若已有瞋便有贪取，则为所烧。为所烧者，为想所烧，所谓男想、女想、命想，此是我许，是名我所。有所者，彼骂我所。骂我所者，谓是凡夫，是凡夫道之所依止，是名我所。

「迦叶！若不闻此法，知于菩提，知菩萨行，此知于行。迦叶！是菩萨行都无有行，名菩萨行。

「又，迦叶！菩萨行满决定清静，极为清静，无有是处。若有精进，斯说大法，此以诸法如虚空聚，不取法聚。是人所说，大法相应，非不相应，斯有功德不住恶处，是有德行非是德行，是能持法，如是受持不着持法。何以故？如来所说，最为第一应供中最。众生问道，我应当以胜法而答。云何胜法？所谓一切诸法无想。

「迦叶！如是菩萨名净持戒，心不起恶，不作障碍，不谤比丘尼，不亲近白衣，不杀、不盗、不邪淫、不妄语、不两舌、不恶口、不绮语、不贪瞋、不邪见，不自恼、不恼他，不亲近欲，不贪欲于欲，不毁谤，不调戏，不自作、不教他作，不至淫舍，不至寡妇，不至童女，不近捕鸟、网鱼、猎师，不近魁脍、旃陀罗人，不近他妻、饮酒之人，乃至不以手执其手而共诤竞，如避恶狗，远此亦尔。舍远此时，乃至不生一念恶心，住于慈心，舍二十事。何等二十？舍离女人终不共戏与其麁语，不共论议，起于鬪诤，离不恭敬供养父母，离不恭敬佛法僧。若女减少无二十众不为说法，除有男子。若比丘尼，聚会说法不往其所，终不问讯于比丘尼，不与女人书，亦不为作，亲族别请不受其请，终不欲心住女人前，乃至不宜共同道行。若有比丘尼而戏弄之后不还报，一切时中，终不受着比丘尼衣，除在四众演说法时有施衣者，生心如地，然后受之，不面前受。一切时中若有比丘尼劝道施衣，终不受取。一切时中设令病苦，若尼劝食，终不食之，况复无病。一切时中寡妇请食，若僧数不满，终不受之。一切时中不入于比丘尼寺；一切时中亦不请唤于比丘尼，请唤拱手仰头弃舍背去。若说法时，有比丘尼来礼其足，至心

合掌，目不异视，不动其足。非为身健名大丈夫，若心勇健，正念一处，名曰丈夫。于一切物不生爱心，于一切时终不生瞋，常当专念于一切智。闻是法已，应当修学而增长之。

「迦叶！向菩萨乘善男子、善女人，闻法已不能修学，是终不得无上正道。何以故？迦叶！由修学故得无上道，非不修学得无上道。迦叶！若不修学得无上道，兔马猫狸亦当得成于无上道。何以故？不正行者，无菩提故。

「迦叶！若以音声得阿耨多罗三藐三菩提，作如是言：『我当作佛！我当作佛！』而成佛者，无边众生亦当作佛。迦叶！但是众生具是行难，乃至一日一夜尚不能专，况复一劫乃至千劫，是故如来出世甚难。

「迦叶！三千大千世界之中一切众生，若一劫、若十劫、若百劫、若千劫、若百千劫、若万亿劫，皆共同声唱：『一切众生，汝当作佛！汝当作佛！』是诸人等如是不懈，常作是言：『汝当作佛！汝当作佛！』口业不息，不能令其起菩提心，若得作佛，无有是处。

「迦叶！我灭度后末世之时，及与汝等般涅槃后，诸天不护，尔时虽有闻我所说发菩提心，有诸比丘发菩提心，当住二十法。何等二十？谓当亲近于比丘尼，食不净食，着揣食，受尼劝食。迦叶！犹如今时多闻比丘，空闲静处，若在众会勤修集法。如是，迦叶！当于尔时，诸比丘等，若在聚落、若闲静处，与比丘尼而共和集勤问于法，当重生于淫欲心，不生法心。是比丘尼多生欲心，少生法心。迦叶！汝观是人得菩提名，当堕大恶可畏道中。

「迦叶！汝观尔时诈以为法共相亲近，若相见时，欲火所烧出不净言，相亲近时用为弟子，初以师法和南礼敬，自是之后当渐遣使；若遣使时，胜达名字；既达名已，私窃为妻，共道入出。后闻他问：『是谁所有？云何族亲呼为姊妹数数相见？数相见故则堕非处，互生欲心，渐现欲相。』以言说之，遂为不净行，习阎罗王法，失于菩提、生天、涅槃，舍于如来，及舍远法，亦无僧利。住于一处，生欲觉、瞋觉、恼觉、害觉，菩萨行业，四净梵行，是人无有，如余菩萨勤四梵行，是人勤行欲瞋等觉，亦复如是。

「迦叶！当于尔时，是恶人住，有是贼住，有鬪诤住。迦叶！尔时禁制悉皆毁坏，闻是等经，便生轻毁，本所持戒，本行檀施，生于欢喜，发菩提心；后闻是经而毁谤之。

「迦叶！当于尔时有是印相，闻如是经而生诽谤，若有净戒持法比丘应如是知、如经句来，应当舍离如是之人，以其无有爱法心故。

「复次，迦叶！当于尔时，是诸人等自唱是言：『我行菩萨道。』生于狂逸，以狂逸故，自称我是大阿罗汉、我是缘觉。彼不可治，不可复住，向于恶趣。

「复次，迦叶！尔时无有作善业者，令多众生毁谤菩提。迦叶！当于尔时，粗有形相。复次，迦叶！当尔之时，有一人行相似波罗蜜，是为后世粗有形相。

「复次，迦叶！当于尔时，如是等经说真实者，当被谤毁，当见舍弃云邪见说。迦叶！时痴人，不知此经禁制破戒。迦叶！当于尔时，悉为恶贼，自不见法，无恼菩提，愚默靖思，谤无菩提。

「复次迦叶！当于是时，无和合僧，粗有形相。

「复次迦叶！当于是时多不知恩，勇健为恶。作何等恶？数数言说，称佛名号以致供养。

「复次，迦叶！当于是时，呵解脱戒，不护口业，不护口业故，不护威仪，住不净处，住不净处，而演说法，我法是时渐当薄贱。

## 大方广三戒经卷上

## 大方广三戒经卷中

北凉天竺三藏昙无讖译

「如是渐渐多有女人，弃舍其夫游诸僧坊。入僧坊已，为一女人而独说法，示解脱法。迦叶！我见尔时纯是非法，五百非法门，五百烦恼门，不修行人。当于尔时，悉是无戒，在家无异。

「迦叶！当于尔时，戒法极恶。若希望利益求菩提者，不应亲近于比丘尼，不住是处，离不亲近，更勿亲近，舍世利养，依乞食行，舍爱衣服，受粪扫衣，舍离台观、床卧敷具，依止山林、坑涧、窟舍，舍离一切甘美病药，依

陈弃药；于诸众生生亲爱想，修行慈心，当忍一切毁骂挝打；舍离一切知识亲族，修业自活，不应同彼在家之人，说解脱戒，当随顺行。

「迦叶！若违解脱戒，便违如来力、无所畏等，则违过去未来现在诸佛菩萨。如是罪报，若三千大千世界所有一切众生悉堕地狱，是等众生所受苦痛，比是苦痛，百分不及一，千分、百千分、百千亿，乃至算数譬喻所不能及。若欲得离如是等苦，应当舍离是痴恶人百千由旬。若闻其声，犹应当离，况复见闻而不离之。应亲近一法。云何一法？一切诸法悉无所有。若忍诸法悉无所有，应当远离如是恶人而不亲近。又复应当亲近二法。何等二法？一切诸法悉无所有，求集诸法，不着集心。云何为集？如所集者都不可得，不可得中而不生心，如离邪见舍离三有，亦复如是行菩萨行，离诸相心行菩萨行。行菩萨行时，舍离如上所说。舍离是已，值弥勒佛，离诸怖畏，作如是言：『快哉！安乐！快哉！得离于魔伴侣。快哉！得离远于恶道。』」

「迦叶！若闻是经已，不怖不惊，自见己身生能持心，如来悉知是人能持于我法藏。迦叶！犹如长者多财封禄，是长者子，所见诸物起父财想。初始见时此是我物，后持此物随所至处处藏举。」

「如是，迦叶！尔时比丘闻是等经，作是念言：『此是如来软妙梵音之所演说。』复有比丘闻是法已，而起诽谤：『是持法比丘作如是言：「此是佛说，最为真实。」少于伴侣，是人劣弱，居处不恶日处藏举。』」

「迦叶！我后世护法城者甚为极少，我持是等委付弥勒为其伴侣，是等当修行于大舍。若有善男子。闻是法已如教而作，是当在于弥勒初会修行梵行，正见众生当护法城。」

「迦叶！我不见有乃至一人不值于我，后五百岁法欲灭时，闻是法已而不诽谤，能受持读诵，无有是处。若已见我亲近恭敬，于后末世五百岁时闻如是经，能受能持能读能诵。如是人等，不待我读诵斯，自当有一切智心，念于我已生于欢喜，作如是言：『奇哉，奇哉！释迦牟尼世尊能受我法、守护于我。』是故，迦叶！当学此法。学此法者，随所欲乐必成无难。」

尔时摩诃迦叶白言：「世尊！如我今者，永无希望失于无上正真之道。世尊！若令我具一切智者，甚用欢喜。若我得无上道者，得希有色身。」

佛告迦叶：「我不道汝，我因汝故说于是等，令少疑惑，速成无上正真之道。复次，迦叶！若有众生渴法成就，修集成就，是等渐渐成无上道，普断一切所有盖缠而为说法。迦叶！菩萨应当成就四法。何等四？菩萨应当发大精进。云何精进？精进者谓不求色、受、想、行、识，集无漏法。云何无漏法者？无地大，不说地大，无水、火、风大，不说水、火、风大，一切言说皆是不实，是菩萨取言说彼岸。」

迦叶白言：「世尊！设有人问：『如来亦以言语说法，可不实耶？』世尊！如是之人当云何答？我今欲从如来。应供。正遍觉闻。」

佛告迦叶：「未来当有诸恶比丘，不修身、不修戒、不修心、不修慧，瞋恚勇盛，口业勇健，不受不持不读不诵如是等经。何以故？是生起色、受、想、行、识，如是等经言说之法。尔时世间当有比丘，生起于色、受、想、行、识。彼时比丘当如是住，犹如在家，终不推求于第一义。迦叶！如生盲人着金华鬘，是不自知。迦叶！将来比丘亦复如是，闻是等经不能持文，况能推求解第一义。迦叶！如有男女为他丈夫之所呵诘，而是男女更于异时，若复闻说是丈夫名，惊恐怖畏。如是，迦叶！后末世时诸比丘等，闻是经说如实过恶，贪于衣服，知己有过，惊恐怖畏。迦叶！犹如猕猴为枷锁系，而是猕猴目不欲见如是枷锁。如是，迦叶！后比丘等亦复如是，闻是等经，目不喜见，背而舍去。迦叶！犹如野干走趣野干，而是野干走趣豕间孔穴深坑。如是，迦叶！未来比丘闻是经已，如野干走，野干驰走谓犯禁戒，闻是等经而生诽谤。迦叶！如野干走趣于豕间。如是，迦叶！未来比丘闻是法已，驰趣还家，驰趣色欲，驰趣女人，趣于鬪诤，趣于医术，趣于断事，住是诸处设犯禁戒，我说是等，喻趣豕间。迦叶！如野干趣于孔穴。如是，迦叶！尔时比丘，身坏命终趣于地狱，我说是等名趣孔穴。迦叶！如野干走趣于深坑，未来比丘亦复如是，身坏命终生刺地狱。迦叶！我说是等名趣深坑。迦叶！同如野干，诸比丘等，不能推求如是等经解其义趣，但能如是毁谤扬恶，身坏命终堕在恶道。」

「迦叶！若有比丘作如是言：『汝说之法悉是不实，如来言说为是真实。』为不真实智比丘言：『大德！今者为执何事？为执于空？为执言说？』答言：『我执言说。』问曰：『汝即是佛。何以故？汝今亦以言说故。』答言：『我执于空。』问曰：『此当分别。何以故？不可分别名之为空，汝之空者即是言说。又汝空者，为是我空？为我所空？为众生空故空？』又复问言：『比丘！汝意云何？汝喜一切法空不也？』答曰：『我都不喜一切法

空。』又问：『大德久失沙门释子之法。何以故？是佛世尊说一切法空，不说有我、众生、寿命，不说有人。』答曰：『我今喜乐一切法空。』问曰：『大德尚喜一切法空，况复如来。应供。正遍觉。大德于意云何？眼是如来不？耳、鼻、舌、身、意是如来不？』答曰：『眼是如来，耳、鼻、舌、身、意是如来。』问曰：『此当分别。若其尔者，大德便为亦是如来。』答曰：『眼是言说，非是如来，耳、鼻、舌、身、意是言说，非是如来。』问曰：『此当分别。若眼非如来，耳、鼻、舌、身、意非是如来，大德先说：「如来即是言说」，今者何故说言非也？』答言：『眼非如来，非离眼是如来；乃至意非如来，不离意是如来。』问曰：『如来说十二入是众生，此当分别。大德！眼、色是如来不？乃至意、法是如来不？』答曰：『眼、色是如来，乃至意、法是如来。』问曰：『如汝言者，一切众生即是如来，一切诸地，一切诸山，树林草木悉是如来。』答曰：『眼非如来，乃至意非如来。』问曰：『若其尔者，则说如来是法非法？』答曰：『色非如来，乃至法非如来。』问曰：『大德！法非如来也？』答曰：『法非如来。』问曰：『若其尔者，有诸众生，说无父母，无沙门、婆罗门不净种性，杀、盗、邪淫、妄言、两舌、恶口、绮语、贪、瞋、邪见，如汝所言皆是如来？』答曰：『非是不善名为如来。』问曰：『若其尔者，如汝所说，法非如来，非法非如来。若非法非非法，则无言说。如大德言，无有言说名为如来。』

「迦叶！应当如是，数数折伏是诸恶人。迦叶！我不见世间人、天、魔、梵，能与如是如法说者而共语论，唯除瞋痴不堪忍者、无因缘者，毁些空法弃舍而去。是故，迦叶！汝等当持如是比经。」

「迦叶！未来世有持是法者，当有三名。何等三？谓说断灭，谓说无物，说无阴聚，无有恭敬。迦叶！当尔之时，如是等经当被诽谤。迦叶！汝观尔时，不恭敬佛，不恭敬法，不恭敬僧。若不恭敬佛、法、僧已，何僧名住？但依言说，依于名字。虽唱佛名，于众显说，而不能见何者是佛。虽口说法，而不能知如来世尊，云何说法？虽作是言：『四向四得，是佛世尊声闻之僧。』但知于名，而不能知依名实德，为于衣服、饮食、卧具、病药缘故，毁谤于法。菩萨是中应勤精进，于是等经生希欲乐，应当受持而读诵之。何以故？是人来世当护法城。何以故？九十一劫不闻演说是空法故。」

「迦叶！我今惟念过世千劫，尔时有佛出现于世，号曰寂灭，寿命八万四千岁，守护菩萨，利益世间。复有如来号曰离垢，寿命二十一劫行菩萨道，然后乃成于无上道。迦叶！汝观如来作几难行摄诸众生？迦叶！劫浊尽时不应

呵是。何以故？迦叶！劫浊尽时，若有一人能信此法，甚为希有。当于尔时，持是法者，不被刀杖瓦石所害，甚为希有。何以故？迦叶！此法是大善丈夫法，谓说一切行是非行，若着我见、众生见、命见、人见、有见者等，所不能解；及依见者，谓依戒见、佛见、法见、僧见、涅槃见，若有起于涅槃见者，如来悉知是为邪见。何以故？迦叶！如来不有涅槃、不得涅槃。迦叶！若有涅槃、得涅槃者，如来悉说名为邪见；若邪见者，说名无智；若为无智之所害者，是愚凡夫。若愚凡夫生天尚难，况佛菩提？

「迦叶！未来世中当有比丘，年二十、三十、四十、五十、六十、七十、八十，乃至百岁老耄无智，庄严衣服，剃发毁形，痴老之人无有威德起于邪业。是临终时，复更造恶，作毁戒法。斯以三事作于奸诈。何等三？示现威仪，示现持戒行、善人相。举指现相，以如此法用显己德，是堕大慢。以痴悔心而取命终，身坏命终堕于地狱。是故，迦叶！我今唱令：『我为汝等真是知识，我教汝等，欲利汝等，怜愍汝等，不令于后受大热恼。』迦叶！我终不听着见众生而得出家，着我见者、众生见者、命见者，着人见者而得出家，我实不听。强在我法而便出家，食重信施，无有真实持戒功德。迦叶！人宁六日断于饮食，非着我见、众生见、命见、人见，乃至涅槃见受食信施。菩萨是中应勤精进，不着我见至涅槃见。」

「迦叶！我是等经，付嘱如是诸善丈夫。何以故？是等所行如我行故。如是之人，即是我侣，即是我伴。」尔时世尊而说偈言：

「诸苦恼众生，	都无有救护，
唯除世导师，	无有戏论者。
诸苦恼众生，	依止下道者，
渐增长诸欲，	由是堕恶道。
无导无利益，	住在嶮旷处，
趣向不正路，	终无有安隐。
犹如持财宝，	求利行旷野，
彼有群贼起，	一切悉劫夺；
失财已还归，	失利增苦恼，
从他所贷财，	以此倍增苦；
是等亦如是，	造业已未还，
本所造白业，	还来食此财。
依止劫夺者，	凡夫堕见者，

执着于我见，  
说空法比丘，  
于是生谤心，  
生起造瞋恚，  
诽谤说不实，  
身恶及口恶，  
坚执着诸见，  
作于恶业已，  
多受众苦恼，  
未来世当有，  
苦切逼比丘，  
于如是等经，  
而不生信敬，  
更互生诤讼，  
更互相谤毁，  
造种种诽谤，  
恶友得势力，  
知正法劣弱，  
是比丘当去，  
当去至何方，  
众恶者除放，  
我如是等经，  
导师如是说，  
我当至此处，  
今法毁坏时，  
或有作是言：  
当至大仙人，  
复有作是言：  
导师如是说：  
宁当至是处，  
非彼嫉妬者，  
是比丘便去，  
见是余住处，  
经行及坐处，  
命见及人见。  
依我人见者，  
速疾堕恶道。  
更互相轻毁，  
于此惭愧者。  
意业极奸谄，  
斯趣极恶处；  
速疾至恶处，  
无有救护者。  
瞋恚勇盛人，  
趣向菩提者，  
无慈者当毁。  
于释师子法，  
速起大忿诤，  
扬恶遍诸方，  
加彼惭愧者，  
柔软者弱劣。  
恶法增势力，  
我之所爱子。  
得于安隐处？  
于此无悲心。  
常当思念之，  
以是自娱乐。  
佛所称誉者，  
柔和者难得。  
『当速离是处，  
得无上道处。』  
『善哉说是语。  
「当游礼诸塔。」  
可乐菩提树，  
瞋恚忿诤处。』  
我所说应行，  
谓佛所住处。  
若石及空处，

集趣是处已，  
『此是大仙处，  
佛本在是处，  
此无上仙人，  
我等今不见，  
人及诸非人，  
善说令欢悦，  
至是所住处，  
既集至此已，  
尔时世导师，  
惊怖魔王众，  
此本道场地，  
过去未来佛，  
此是勇健者，  
加趺坐七日，  
是人供养已，  
是处转法轮，  
是比丘往彼，  
『勇健者来此，  
五人见佛已，  
而共计议恶，  
是大悲世尊，  
为五比丘说，  
礼法轮处已，  
复至涅槃处，  
尔时世导师，  
碎末破己身，  
咄哉！佛世尊，  
今唯闻其名，  
是无上仙人，  
大智知是已，  
或游行命终，  
游行竟命终，  
于后末世时，

数相对啼泣：  
经行受用处，  
见处不见佛。  
所说无上法，  
有为悉无常。  
天龙悉等来，  
我等今不见。』  
谓菩提树下，  
正念善思惟。  
得无上菩提，  
犹如小野干。  
如来所坐处，  
悉在是坐处。  
亿天所恭敬，  
观视此树王。  
复诣说法处，  
声闻于梵世。  
数数而啼泣：  
调伏是五人。  
即生起忧恼，  
皆悉勿为起。  
于众起悲心，  
转甘露法句。』  
复数数啼泣，  
见佛最后处。  
利益多众生，  
佛此入灭度。  
释师子能仁，  
而不覩其形。  
善贤最在后，  
此是我最后。  
或住处命终，  
悉往生善处。  
是广大佛法，

斯当得涅槃。  
若毁戒比丘，  
服食重供已，  
观此诸比丘，  
智者于后终，  
是等照世灯，  
大智慧菩萨，  
当住营事人，  
我当得作佛，  
当供彼世尊，  
一切智记我，  
是有大势力，  
虽不见于佛，  
我当安慰此，  
修行菩提分，  
若有诸女人，  
我亦安慰是，  
舍是女身已，  
得见于弥勒，  
一切所求索，  
随学是智者，  
有于坚欲已，  
斯为弥勒佛，  
是故闻是利，  
坚信而趣向，  
谁有求是处，  
有慧及精进，  
不作谄曲心，  
常住闲静处，  
舍弃如是处，  
此是大贪贼，  
若为于饮食，  
诈现执正法，  
斯不净活命，

诸住净戒者，  
普亦得供养，  
速往至恶道。  
有如是差降，  
速疾得生天。  
怜愍世间者，  
慈心利众生。  
踊跃欢喜心，  
亦得值弥勒。  
在一切众前，  
如我之所念。  
我说如是义，  
当知如面对。  
亦复当如是，  
悉礼一切佛。  
向无上菩提，  
及无量如来。  
速成男子身，  
是当供养之。  
悉皆如其意，  
生殷重坚欲。  
持戒广多闻，  
得受于记别。  
生起贤善信，  
摄一切众生。  
而有不得者，  
菩提不难得。  
修习行慈心，  
此名菩提行。  
但说菩提处，  
一切诸远离。  
及诸利养事，  
更互共演说。  
以痴用自活，

为众恶所害，    恶道所侵逼。  
是一味法门，    但假比丘名，  
毁谤如此法，    及与解脱戒。  
若有持戒者，    我说禁戒法，  
像比丘当谤，    彼不至贤处。  
一切天世间，    悉皆弃舍离，  
一切智世尊，    亦倍离是人。  
若身无恶业，    口业亦无恶，  
意业悉清静，    速疾至涅槃。

「迦叶！如来灭后后末世时，有诸比丘于先佛所种善根者悉般涅槃，纯善众生命终去尽。有后五百岁时，当有比丘贪求无厌，瞋恚别离，龕涩毒恶，瞋面齟齬，住于三法。何等三？专修医道，住于贩卖，亲近女人。住是三法，当失四法。何等四？失于戒聚，失于善道，失得果证，失如实见法。是人于此四法已，复增炽四法。何等四法？嫉妬炽盛，瞋恚炽盛，贪他家炽盛，贪着利养贮聚炽盛，贪爱衣服造作箱篋，以此为业，空无所有，无沙门法。闻是法已，当堕四法。何等四？堕在谤法，不知时言，独为女人而演说法，渐毁犯戒。闻是等法已，堕在灾祸。」

「迦叶！犹如恶狗打触其鼻。迦叶！于意云何？是狗为当倍恶不？」

白言：「如是，当倍增恶。」

佛言：「迦叶！是等恶人如彼恶狗、如毘舍遮，若净意比丘，持是等法、说是等法，真实少欲，叹说少欲。是等闻已，惊怪不信，沉没怯弱，生于恼热，复增瞋恚，当住何业？是时未至，我今预说。彼闻此经，当生诽谤，如被牟刺，生大瞋怒，作如是言：『此非佛说。』毁少欲者作如是言：『当名是人为多欲者，非是少欲。』迦叶！我常种种叹少欲者，叹知足者、善布萨者、易共住者、行头陀者、阿练儿处者、净活命者，汝等莫共是杂恶行者，而共是同。何以故？此是在家法，莫以是法侵欺于人。是在家法，汝等不应起大瞋忿；汝等莫大多集财物，当舍财贿；汝等慎勿显现异相，叹誉己德；汝等应当无所系恋，勿多贮积；汝等勿畜驼、马、牛、驴；汝等不应懈怠懒惰，当勤精进，断不善法，修集善法。」

「迦叶！我常种种因缘，赞叹阿练儿处，清静寂静，离亲近家。后末世时，违我此法，违我法已，欲造众患，毁谤正法。迦叶！犹如有人热时服苏，服

已患渴，语余人言：『汝与我水。』是人答言：『善，大丈夫！汝勿求水，以服苏故，汝莫因此，而便致死。』是人瞋忿，毁骂此人，不顺他故，饮已命终。如是，迦叶！未来比丘着有见者，住于诸恶，持是比丘作如是言：『此事应住，此不应住。』反生瞋恚，毁谤骂詈，谤是等经，如来教法。是故，迦叶！如是等人反与如来而共诤竞。

「迦叶！汝且观是贤护比丘，如来制戒，诸比丘僧一坐而食。闻已瞋恚，于三月中不至我所。迦叶！尔时梵行清净完具，尚能如是，况灭度后贪着饮食，贪着衣钵卧具病药，为睡眠所覆，瞋恚勇盛。闻是等经，尚不恭敬于佛如来，况余比丘如法行者。迦叶！若是等法已隐灭者，极为不善，甚为不善。」

「迦叶！若善男子，欲求善利信我是法。后末世时，浊恶灾变，我法末时，末世滓秽，瞋恚盛时，善人难得。时若有闻信是等深经，当信是人作于相应，非不相应。当言信受，非不信受。迦叶！我今亦说，名为相应，非不相应，非是不信。」

「迦叶！犹如恶马与善调马而共同驾，若安静无声尚不调顺，况当吹贝椎钟鸣鼓，能堪忍之，无有是处。如是，迦叶！破戒比丘，若能堪忍善丈夫法，无有是处。迦叶！犹如恶马以鞭一策，是马惊畏。如是，迦叶！若闻一说无我空法，着我想者惊畏怖恐而起诤讼，况复广说。」

「迦叶！应当发起大精进根，发大庄严，降伏百千万亿诸魔，令其毕竟不起诤讼。云何起精进根？无欲是精进根，头陀功德是精进根，无贪是精进根，无痴、无瞋是精进根，无嫉是精进根，离欲是精进根，独无伴侣是精进根，离于睡眠是精进根，于一切时不起一切诸恶之心是精进根，于一切时不起欲心是精进根；不起疑心，起大精进，离一切疑；离一切疑，大庄严已，发菩提心无所依倚，况复当起于我想也。是终不应起于我想、众生之想、命想、人想、男想、女想，不起地大、水大、火大、风大之想，不起欲界想、色、无色界想，不起戒想、犯戒之想，不起空想，悉不应起一切诸想，至涅槃想亦不应起。云何名为不起诸想？如是诸想是中颇得。」

「迦叶！若贪欲不实，知灭欲者亦复不实。迦叶！欲无定处但虚妄说，是故如来如实而说。此欲非我如是之法，是寂灭法。云何寂灭法？若执无着，是则着想如须弥山，若人着想，当知是人败失圣法，彼不能起于沙门法，不住

沙门法，是则名为痴人痴者，永不能起沙门法。何以故？是着想者，无量劫中为无间狱之所摄故。

「迦叶！如观拘迦离比丘、提婆达多比丘、碎财比丘、黑丘舍比丘、海与比丘。迦叶！马师比丘、满宿比丘、善星比丘，是我给侍，面闻我说，见我经行，见我端坐，见我神通，经行虚空，见我降伏百千外道，如是等人尚于我所不生好心，以足下虫与我相违自致恶道。若有实说如来功德，应栴檀末如须弥山，以散其上作大宝盖，如三千界，于是人上虚空中侍。何以故？迦叶！能有信心称佛名号，实信者少，况有信已从佛出家，远离欲秽修无着禅，甚为希有。迦叶！若众生能持于我所说禁戒，信解如是甘露之法，倍为希有。」

「迦叶！犹如大众聚集祠处作一革箱，形容极妙彩画众色，盛以粪秽。若复有人，以上衣裹持行示人，中有见知其不实者，背而舍之。如是，迦叶！若有比丘，见于如来功德法祠，中有比丘有于我想。迦叶！若有我想，则起于欲，若有他相，则起于欲。迦叶！无我想者，闻是等经不生瞋恚。何以故？毁谤他者此为不善，以是事故，闻此法已，得于好心。若有染着于我相者，是为邪见；若邪见者闻于是等真实教诲，则生瞋恚。何以故。迦叶！有我相者则起瞋恚。迦叶！若比丘、比丘尼、优婆塞、优婆夷，闻是等法若起瞋恚诽谤之者，是人但有沙门形名，我非彼师，彼非我弟子。何以故？其妄语者非我弟子，我亦非是妄语者师。何以故？迦叶！如来世尊是实语者，如来说言一切法空。」

「迦叶！如来世尊坏一切我，是故是人与如来诤，若有与佛如来诤者，说名为魔，如来不听魔党出家受具足戒。迦叶！若说小马从龙象生。迦叶！于意云何？是人语者为可信不？」

迦叶白言：「不也，世尊！」

「迦叶！是语相应不？」

「不也，世尊！」

「迦叶！若有众生着我相、众生想、命想、人想，乃至涅槃想，称我为师，倍不相应。」

「迦叶！若有人来，作如是言：『金翅鸟王从鸟而生。』迦叶！汝意云何？如是之言为可信不？」

「不也，世尊！」

「迦叶！如是言语为是相应？为不相应？」

迦叶白言：「是不相应。」

「迦叶！若有着我，乃至有着于涅槃者，名我为师，倍不相应。迦叶！若使有人作如是言：『有萤火虫负须弥去。』迦叶！汝意云何？如是之语为可信不？」

「不也，世尊！」

「迦叶！是相应不？」

「不也，世尊！」

「迦叶！诸恶人等，着于我见、众生见，至涅槃见，名我为师，倍不相应。」

「迦叶！犹如大王有给使人，更有余人，人不识者。假依此使虚传王令至大富家：『王作是令，王语某甲，作如是事。』时诸大臣及诸富人，见是异人乘自在处，答是人言：『我当作是。』时诸富人往至王所，为活命故。如是，迦叶！如来福力具足自在，如王安乐无有怨敌，王居大地饮食具足，如来僧众亦复如是无有怨敌，住佛国界法食丰足。有一异人无有请者，来入众中，自说我见至涅槃见，作如是言：『如来说是，如来说是，此应作，此不应作。诸如来所有信心者，不违佛教。』闻是说已，自割衣食及妻子，分上妙好者而给与之。信恭敬与信敬而与至未识时，如是之人如彼异人，是食供已，乐喜众闹，论说王事、贼事，论说饮食、论说淫女，论说医事，作如是言：『月蚀、日蚀，诸王来去，论说王家。』复作是言：『是处得食，是处不得。』作如是等种种论说，以是尽日夜还住处，二宿、三宿乃至六宿，随所宿处，论说诸事，种种嫉慢，种种戏笑，言语杂合，涎唾流出，乱想睡眠，随所想处，卧则梦见，梦见自身往至彼处承迎恭敬，既睡寤已互相说梦：『大德！我夜梦汝往于是处得如是物。』彼作是言：『此梦吉祥，宜应速往。』是便往诣城邑人间，眼目视瞻，摇动眉目，心多所期，逼恼生热，心不专一，威仪轻躁，诸根不谛，心乱调动。至他家已，毁犯禁戒，与一女

人共独说法，因缘戏笑，渐现欲想。以其利养，得利养已，爱乐贪染耽重，或着常居止住，若违本意啼泣而去。趣于二处浓厚之处及赞叹处，若不浓厚，骂是施主；复相聚集，互相问言：『谁施于众？众何所得？为得几许？汝食几许？』迦叶！有如是等不相应行，乃至于死。

「迦叶！是等复有不相应行，谓谤正法。迦叶！当知，应当于是恶比丘所生于悲心。何以故？是等当获大苦报故。」

尔时世尊，欲重宣此义，而说颂曰：

「凡夫王给使，	为欲活命故，
游历于诸家，	王作如是令。
彼闻勅令已，	莫瞋谪罚我。
愚凡以此势，	常用自活命。
何况佛最胜，	于百千亿劫，
布施于手足，	多造众苦行。
此非我法王，	令住是谪罚，
亦无有问者，	为当作不作。
在家施比丘，	上妙美饮食，
衣服中妙者，	一切恭敬与。
自己不服食，	又不与子息，
聚集上妙色，	以施持戒者。
不相应行者，	食已速舍去，
共集于一处，	相问乐食不？
说王及贼事，	又说关遯事，
亦说饮食事，	云何佛聚集？
或说日月蚀，	问王去来事，
彼当得于胜，	亦说当尽灭。
是不相应语，	数数恒演说。
此是半应缺(诸藏皆少一句)。	
速往于彼家，	是多富有处，
是家极慳悋，	不得上美食。
生如是觉想，	百种思虑已，
恶行不知者，	犹驴负重担。
于是夜梦中，	见本所忆事，

寤已相向说，  
无忧大喜笑，  
速往成此事，  
往诣村城邑，  
邪视动眉目，  
是入城邑已，  
弃舍于佛经，  
既至是处已，  
毁骂是施主，  
复共相聚集，  
『汝得何等食？  
比说如是事，  
如是所思觉，  
是起于净讼，  
当以此为药，  
佛当奈是何，  
是舍所修行，  
我见及常见，  
彼当修是行，  
斯当受些苦，  
凡夫少觉知，  
诸是释师子，  
不以活命故，  
智者不贪食，  
于食修不净，  
断诸欲漏结，  
彼修行方便，  
知于无净法，  
数数而修集，  
勇健智慧人，  
魔及众怖畏，  
此终无有爱，  
是勇健佛子，  
正法不久住，

种种而解释。  
汝当得安乐，  
勿迟后致悔。  
如是不正行，  
犹若如猕猴。  
为女人说法，  
及与解脱戒。  
云何设龕恶？  
及所知识者。  
更互共相问：  
所得食妙不？』  
经于百千岁，  
以是为自活。  
聚酒及香花，  
则便少病痛。  
纵令有百佛，  
习近在家法。  
起见已爱着，  
以致至恶道。  
诸谤正法者，  
修集在家行。  
实行诸声闻，  
而毁犯禁戒。  
起于动摇想，  
定坐报施恩。  
修集于诸想，  
从佛法出家。  
诸所说空法，  
中不得**坚实**。  
知于空道者，  
是报信施恩。  
亦不毁败空，  
二足中福田。  
多有恶人故，

柔软比丘少，不放逸利者。  
智者作是虑：『不久速至死，  
我夜当云何？昼亦如是尽。  
世更无救护，唯除二足尊，  
诸学及无学，皆悉当灭度。』  
此不知如是，随宜所说法，  
欺不恭敬佛，及无上正法。  
正法欲毁灭，应当勤精进，  
未久当得闻，乃至于少许。」

## 大方广三戒经卷中

## 大方广三戒经卷下

北凉天竺三藏昙无讖译

尔时大德迦叶白佛言：「奇哉！世尊！闻是等经，乃能不生爱惜之心。」

佛告迦叶：「众生成就四法，闻是等经不生爱惜心。何等四？多诸放逸，不信业报，不信大地狱，不信我当死。迦叶！是名四法不生爱惜心。迦叶！众生复有四法，不生爱惜心：自怙强壮，自怙有力，染着五欲耽荒嗜酒，不起善心。是名四法不生爱惜心。」

「迦叶！比丘成就四法，谤佛菩提。何等四？本造众恶，毁乱正法，现造恶业，谤比丘尼。彼有和上阿阇梨，多人所敬，然谤菩提；是亦随学谤于菩提；少于闻见，以嫉妬故谤佛菩提。迦叶！是名四法谤佛菩提。」

「迦叶！又有一法，沙门婆罗门之所应作。何等一法？于一切法心无所住。是为一法沙门、婆罗门之所应作。迦叶！犹如有人堕高山顶，其心迷闷，无所觉知，不识地处，不识树处，悉作空想，出入气息断绝不续。如是，迦叶！彼执一切法，执着眼想，执着眼相，作非沙门法，非婆罗门法。如是执着耳、鼻、舌、身、意想，执着耳、鼻、舌、身、意相，作非沙门法，非婆罗门法，执着色、受、想、行、识想，执着色、受、想、行、识相，作非沙门法，非婆罗门法。执着净持戒，执着持戒相，求于菩提。执着多闻，执着

多闻相，求于菩提。执着惭愧，执着去来，作非沙门法，非婆罗门法。若有执着，则为所害。云何为害？为贪所害，瞋、痴所害。执着眼想是执着眼相，为眼所害，爱不爱色。如是执着耳、鼻、舌、身、意，以执着故为意所害，谓可意法、不可意法。若为所害，则为所欺。所谓地狱、饿鬼、畜生及与人天诸所害者，皆由着故，为其所害。是中云何名为想着？谓想着我想，着我所想，着地大、水火、风大想，着骨想、坏想、青想、虫想、血涂想、脆想、解脱想，而是解脱当有何想而犹执着？谓执于此，当得解脱，执着过去无量生处，执着我当忆念是处，执着未来及着现在，起如是想：『我是过去，我是现在。』随在在处皆起想着，乃至涅槃亦起想着。作是念言：『我当得涅槃。』起是想着。迦叶！略说乃至随所意想，皆名为着，乃至空想皆名想着。如是皆悉非沙门法，非婆罗门法，非沙门行，非婆罗门行，沙门婆罗门法，如来所说。

「迦叶！犹如虚空及与大地，不作是念：『我是虚空，我是大地。』如是，迦叶！沙门、婆罗门不作是念：『我是沙门，我是婆罗门。』所作之法，以何缘故名沙门我是婆罗门？迦叶！若无意念，是名沙门、婆罗门所作之法。以何缘故名沙门、婆罗门所作之法？沙门、婆罗门不作是念：『我当作是，我不作是。』沙门、婆罗门终不作于如是之念。

「迦叶！犹如有人于夜闇中，以其两手扞摸虚空，摇动口鼻，作如是言：『我弄世间，我弄世间。』迦叶！于意云何？为弄于谁？」

迦叶白佛言：「世尊！是人自弄。何以故？是黑闇中，无人见故，无可弄故。」

佛言：「如是，迦叶！若有比丘，至阿练儿处，或至树下，若至露处、空处，作是想念：『眼是无常，耳、鼻、舌、身、意悉是无常。』作是思惟：『思惟色是无常，声、香、味、触、法悉是无常。』作是想念：『我趣涅槃。』则为自诳，非沙门行。何以故？先着于眼，后修无常，后行无常。作是恶执，先执着耳、鼻、舌、身、意，后修无常，后行无常。而是三处俱不可得，执着三处随所想着，当于何处而得一心？」

「迦叶！诸佛菩提极为甚深，难得难到，生死难过。迦叶！云何名一心？推求法时，不见一法，不得眼实，不得耳、鼻、舌、身、意实。虽言一切诸法不实，亦复不得。何以故？本性如是。本性若尔，终不生心言。一切法不实、叵得，不得是心。若过去世、未来、现在，无念、无行，是名无行。云

何名无行？无新无故，故名无行。是中无过去心解脱，无未来心解脱，无现在心解脱。若不得心，是名一心，是名说一心。

「迦叶！未来当有自名比丘、比丘尼、优婆塞、优婆夷，是等当作破坏言说：『彼有阴想，如来所说五阴如梦。』是等尔时说阴是实：『此梦是有，有梦言说，梦若无者，我等何由于是生想？有此说故，我等于中，而生梦想。定有此阴，是故说言阴犹如梦；若无有阴，则不应说阴犹如梦。』是诸痴人复于此梦而生实想，闻是等经，而生诽谤。有比丘尼往施主家唱如是言：『某是罗汉，某是罗汉。』是比丘等，依止浅智比丘尼住，妨废善事，造不善业。是中优婆塞、优婆夷，闻于少戒，乃至少偈，闻已便去。

「迦叶！当尔之时，诸比丘等有二十腊至三十腊，住阿练儿处，有优婆塞初信一日，所解佛经等无差别。迦叶！当尔时世互唱空名『此空此净，此空此净。』时有比丘，闻是法已共相聚集，闻已不畏作如是言：『此经不与出家相应，非在家相应，共舍弃之，非导师说。何以故？此非我同，又不汝同。』若有闻说甚深大法，在家出家悉当诽谤。何以故？迦叶！今者梵行极为纯净，信者尚少，况复尔时，如是智者渐已灭度，好者转少好者转少。

「迦叶！当于是时，千比丘中求一比丘正入正解，犹尚难得，设有一人轻笑不学，乃至三千比丘众，欲索一人正入正解，亦当难得。迦叶！当尔之时，在家出家互相诽谤。迦叶！未来若有诸比丘等勤行精进，为断一切诸不善法，成就善法，初夜后夜离于睡眠，是诸恶人当夺其命，轻贱呵毁，舍而弃之。迦叶！当尔之时，佛法毁坏，比丘毁坏，是中智者信甚深者、无染著者，应好恭敬，应好爱念，共相聚集，住空闲处。」

尔时世尊而说偈言：

「我此所说法，	为明第一义，
说阴无坚实，	观之犹如梦。
尔时诸比丘，	更互共鬪诤，
彼此无有异，	是得于有相。
比丘作是说，	彼报言：『如是！
如此之法眼，	当无有差别。』
比丘语在家：	『汝甚为希有，
能解此菩提，	汝逮得初果。』
彼自谓见法，	来亲是比丘，

持最上供养，  
如此比丘说：  
与我所知同，  
施主及比丘，  
破坏佛菩提，  
勿亲彼近我，  
汝当速疾得，  
此是第一句，  
和合为一侶，  
犹如大恶贼，  
令聚落空荒，  
比丘当如是，  
无慧毁禁戒，  
我所说应离，  
自说是罗汉，  
自和合聚集，  
有名无有智，  
若复有比丘，  
尚说其恶名，  
毁谤于菩提，  
诸天极忧苦，  
闷绝坠于地。  
云此释师子，  
奇哉佛世尊！  
奇哉福田僧！  
我更不复闻，  
当有大痴闇，  
发起大音声，  
唱令告诸天：  
莫后诸天龙，  
仁自闻佛法，  
是佛无数劫，  
堪忍是众生，  
是佛世导师，

数数而奉施。  
『真实无有异，  
见法而语我。』  
不住于正法，  
是出时未久。  
我是说道者，  
如我之速得。  
更互说寂静，  
毁坏于我法。  
杀害诸聚落，  
及与诸城邑。  
无智闇钝者，  
依着我命人。  
而反依于眼，  
实是增上慢。  
我是最上僧，  
一人尚难得。  
有恶往如实，  
云非佛声闻，  
法王之所有。  
数数而啼泣，  
有信诸天等，  
胜法今毁坏。  
奇哉离染法！  
佛之所爱子，  
法王之所说，  
能仁法毁坏。  
地天及中间，  
『法炬今欲灭，  
而致大悔恨。  
今当更不闻，  
若自及与他，  
何时当成佛？  
为一切众生，

所演说正法，  
今法坏乱起，  
魔使极恶魔，  
诈伪无智慧，  
炽盛生瞋恚，  
闻地天声已，  
四大天王等，  
夜叉众来集，  
悉皆同愁泪，  
大音甚悲切，  
更互共相语，  
『诸庄严城邑，  
一切无光色，  
是城无威德，  
是城无威德，  
我本所生处，  
见已闷蹙地，  
诸天下至地，  
如此真实法，  
下至阎浮提，  
佛子见逼恼，  
胜成七日中，  
是诸天七日，  
『咄哉勇健佛，  
今者永不见，  
舍卫所住处，  
于是住处地，  
『此是佛所坐，  
演说四圣谛，  
世间还黑闇，  
作恶已当往，  
多有诸天宫，  
众生无救护，  
此是经行处，

今当灭永尽。  
极造大暴恶，  
少欲者劣弱，  
幻伪小凡夫，  
谤毁善逝法。』  
上天生惊怪，  
闻已生愁闷，  
聚在旷野城，  
发大呼哭声。  
诸天悉来集，  
心中所念者：  
众宝之所成，  
犹若如土聚，  
无须臾可乐，  
如本可爱乐。  
诸天众来至，  
当作如是报。』  
往至可畏处，  
今者悉毁坏。  
见大毁坏事，  
逃窜至异处。  
无诸威德色，  
数数而啼泣：  
我等面覩见，  
佛法复灭尽。』  
来至恭敬已，  
数数而啼泣：  
人尊所坐处，  
我等面自闻。』  
互不相恭敬，  
堕于恶道中，  
皆悉当复空，  
阎浮提如是。  
空荒悉毁坏，

世间不可乐。  
帝释自在主，  
忧愁受苦恼，  
诸三十三天，  
如所闻诸国，  
当有诸天等，  
导师舍离我，  
诸天更不食，  
帝释天六月，  
阿修罗等闻，  
我等今当往，  
阎浮提诸王，  
天阿修罗集，  
有诸比丘等，  
有诸比丘尼，  
在家毁戒者，  
发大恶声已，  
有诸恶女人，  
世界悉动摇，  
有逃至聚落，  
众生悉驰骋，  
多有诸贼盗，  
种五谷不获，  
时谷米勇贵，  
死后堕饿鬼，  
诸有塔寺处，  
尔时诸比丘，  
如是等众苦，  
宜当速疾作，  
诸凡夫无智，  
造凡夫行已，  
应当勤读诵，  
以慧教众生，  
以慧光照明，

法王灭度后，  
三十三天中，  
发起大音声，  
举手而号哭，  
在中而驰走。  
数数论说佛，  
能多说法者。  
无诸歌笑声，  
心中甚忧恼。  
佛法无光明，  
至三十三天，  
当坏佛塔寺，  
尔时当有是。  
当堕在恶道，  
亦堕于恶道。  
住家优婆塞，  
当趣于恶道。  
是亦至恶处，  
尔时有是事。  
有走至山林，  
少有存活者。  
及与诸饥馑，  
蠪虫作灾患。  
人有命终者，  
于是受众苦。  
四方招提僧，  
当共分取之。  
于我灭度后，  
莫观见是时，  
诸凡夫无慧，  
速疾堕恶道。  
从慧者来处，  
速至于善道。  
应当学如我，

舍一切烦恼，  
正法不久住，  
我如是戒勅，  
于我灭后时，  
有闻佛名号，  
互共来集会，  
食母及子肉，  
诸有生小儿，  
儿自在室，  
有见闻此者，  
谁生于贪欲？  
生无智慧根，  
生起众苦根，  
若有痴众生，  
若有智慧人，  
不正造业苦，  
此果是有漏，  
若诸无漏法，  
不坚寂静者，

速疾至涅槃。  
应坚勤精进，  
应当正修行。  
六十小劫中，  
谁当有爱者？  
为饥所逼切，  
互展转为是。  
不令至余家，  
犹生大恐畏；  
生死苦如是。  
欲想是女人，  
欲本是女人，  
是故应舍苦。  
亲近欲女人，  
速至于涅槃。  
果报来应现，  
是故堕恶道。  
空为无所有，  
速应修行道。

「迦叶！是名比丘成就初法。若有欲乐无漏法心，应不住于一切诸法，说一切法。」

「复次，迦叶！菩萨应当坚作坚住。云何坚作？云何坚住？应坚其心，应坚精进。是中云何名曰坚心？名曰坚进？迦叶！坚心者，菩萨应生如是之心，供养恒河沙等诸佛，然后乃发于一念心。如是恒河沙等劫中无一佛出，如是复起恒沙等心，得一人身，得于是恒沙等身，闻一句法，增长此慧至无上道；是菩萨生如是之心。是菩萨念：『我今应当修行如是难行苦行，精进勤修于佛智慧，我今应当如是推求。』迦叶！菩萨应当如是坚心。迦叶！我引是喻，诸有智者以喻解耳！迦叶！若如是苦行得于菩提，恒河沙劫不应懈怠，勤学不懈，勤学不息，恒沙等劫学于菩提。菩萨念：『我今应生坚势坚欲，我终不舍无上正道。』迦叶！菩萨如是应坚其心。迦叶！若有菩萨，如是坚心，为取何等？谓不取处、不取非处。云何不取处、不取非处？若处、非处悉无所有，不障碍于阿耨多罗三藐三菩提，速疾得成。迦叶！若使三千大千世界，满中七宝持用布施，若于如来今所演说如是等经，趣向菩提正眼

之处，推求索之，依附依住，是人福聚倍多胜彼。迦叶！菩萨应当如是坚心，亦复不得于是坚心，然不休息。云何初业多殖初业？云何多殖？不谓一心能知多业。何以故？是法不可以言说故，恒于是中多种初业，所谓坚心。」

尔时世尊而说颂曰：

「非心作心相，	常有大怖畏，
我当成不成，	是事当云何？
是常起疑觉，	住在于一切，
修造作方便，	云何得菩提？
彼是懈怠想，	非是菩提想，
斯有一切疑，	若佛及声闻。
希望而不及，	善贤诸佛法，
不以音声故，	能获值安乐。
斯有信欲乐，	能集极胜妙，
非但小思惟，	能获得胜道。
于一切法中，	当住于一法，
觉智增益已，	修行为得道。

「迦叶！说是法时，若有菩萨成就此行不值于佛，而自说言：『我当作佛。如来。应供。正遍觉。』迦叶！在家菩萨应如是作，云何修行能得菩提？迦叶！在家菩萨有三种业求于菩提。何等三？生极欲心，于一切智不着本作，应持五戒。具是三分，趣于六法。何等六？得于圣法，诸根完具，不盲聋哑，不龕恶色，速得信心，不畏深法，闻已速解，疾得不退，应当具足如是六法。五障法应当善知。何等五？知于两舌，终不妄语，菩萨之人应见是慳是菩萨障，应当不慳，若着于欲是菩萨障，终不作欲。如是五法能作障碍。又复应当作于三法。何等三？常恒有于欲出家心，于净持戒沙门、婆罗门所，殷重恭敬从受教诲，诸有着相演说法者应常远离。何以故？是菩萨所不应学故。菩萨不应担不实草。何以故？是非菩提故。若担不实，是学障碍，不学集法。

「复次，迦叶！菩萨当学于三法。何等三？心常专念趣向作佛，应当精勤修习读诵，常于众生修行慈心。应当修集如是三法。又复应当亲近三法，何等

三？离搏捶打，不说他人云是卑贱，怖畏众生而为作救。应当亲近如是三法。」

而说偈言：

「不亲近下人，	见不正直者，
见已当远离，	犹远恶毒蛇。
不应学于彼，	亦不礼敬是，
应当极远离，	犹如见恶狗。
是人堕恶道，	诸有着相者，
若修是学者，	此亦同彼去。
不疑于空法，	闻于佛法已，
及乐空比丘，	此所生恭敬。
是中增多闻，	亦生利智慧，
得近菩提道，	为一切所礼。
速疾受斋戒，	速受已读诵，
斯增益智慧，	犹水青莲华。
速疾受斋戒，	多听受于法，
斯增益智慧，	以断诸漏结。
大智大精进，	大威德无畏，
作利以益己，	及利益于他。
终不打搏他，	应当乐如是，
进助菩提分，	是人法无减。
是人少病患，	有最上妙色，
为众生所爱，	爱利益已法。
修行于慈心，	住在家菩萨，
舍一切恶道，	速疾得生天。
是得天名已，	五欲自娱乐，
从天命终已，	终不生恶道。
生在人道中，	种族豪贵家，
形色极殊妙，	无有能欺者。
无能所守护，	是人修行法，
得见于胜处，	一切众生爱。
善得安隐眠，	寤已欢喜乐，
终不生怖畏，	是亦天所护。

犹如粪秽法，  
居家亦如是，  
当为诸善人，  
怖者施无畏，  
更不事余天，  
此道极正直，  
是以此善根，  
一切智三明，  
如所作功德，  
斯亦当见礼，  
如所作功德，  
当为众生上，  
住于在家地，  
此所称赞法，

彼有是观相，  
广及余亦尔。  
所称誉赞叹，  
诸在家菩萨，  
亦不见余天，  
诸慧者所集。  
舍一切恶道，  
善学三戒故。  
如其所礼事，  
诸众生独故。  
如其所礼事，  
如佛见礼事。  
起作菩提心，  
及余法今听。

「迦叶！在家菩萨应成三法。何等三？应当远离恹望吉祥，是菩萨应修治舍宅，除诸妨碍，勤修多闻。菩萨当具足三法，复起三法。何等三？不应断绝说法师辩，应当勤请于说法者，应当常燃灯烛众明。应当修行如是三法。」

「复次，迦叶！在家菩萨应当终究不造三法，作女人行。何等三？不留难母令不听法、不留难母不往比丘所、不遮固妻至比丘所，欲听法者不作障碍，于女人所不舍正道而犯非道。如是三法一切不作，若造此业便堕女人。」

而说颂曰：

「应当燃灯明，  
得无尘垢眼，  
导师以此眼，  
若知如此智，  
知过去世法，  
不意想未来，  
若有是三相，  
悉同为一义，  
佛所说诸根，  
以彼不分别，

数数以信心，  
及获得佛眼。  
能知于一切，  
则知于实智。  
现在亦如是，  
不造作三相。  
三亦应当舍，  
相即为非相。  
然法无有根，  
菩提最为上。

净修佛眼已，	悉皆现了知，
是句即菩提，	如上之所说。
如是所说法，	亦不毁坏法，
一切法是空，	是故名为说。
诸外道邪见，	为在家说法，
如作于明灯，	有眼者能知。
不断他说法，	于释师子法，
莫速至恶道，	疾作生盲者。
数数而劝请，	演说善逝法，
以此之善根，	转无上法轮。
不应作留难，	若母欲听法，
作极恶女人，	盲倮极丑恶。
不见观众色，	亦不闻妙声，
在于黑闇处，	犹如如蛇住。
作于障碍已，	贪嫉为妻故，
速疾命终已，	作弊恶女人。
黄头而青眼，	黑恶难可看，
疽恶脚缭戾，	聋駮无所知。
于如是等处，	无慈者速受，
为嫉妬男子，	数数造欲因。

「复次，迦叶！在家菩萨不应作三法。何等三？不请女人为欲因缘、施苏醜醐及诸恶施，若欲出家不作留难、未出家者劝令出家，造如来塔作营事人劝助示导、不应侵夺取于是物。如是三法，在家菩萨所不应作。」

而说颂曰：

「不施他女人，	不造作非法，
无婚过难来，	故一切不施。
有言者往彼，	合掌而作礼，
与已复当与，	以善欢喜心。
若彼僧中少，	为僧给使人，
若有请取是，	应佐少人者。
勿触水令浊，	若有依此者，
于斯无嫌害，	生心起瞋恶。

若有欲出家，    自子及亲属，  
菩萨于是中，    终不作留难。  
令诸众生乐，    得证于灭度，  
此是我本欲，    说于无上法。  
知是诸过已，    自不造诸妬，  
莫长夜常忧，    为烦恼所染。

「迦叶！在家菩萨复有三法不应修集，何等三？不买男子、不买女人、不施毒药，若有作者亦勿亲近。」

而说颂曰：

「离买男子业，    亦离买女人，  
不施与毒药，    若与者远离。  
天亦呵是法，    众生得苦恼，  
随趣诸方面，    忧恼箭所害。  
此长夜忧恼，    多获众苦恼，  
亦绝便命终，    是故不应作。  
是过及余过，    我知是所作，  
今说其少分，    为于菩提故。」

「迦叶！在家菩萨不应造三法。何等三？不至淫女家，若男若女不犯非道，若屠牛处不在边住。如是三法，在家菩萨所不应作。」

而说颂曰：

「不至淫女家，    秽恶为欲者，  
速致不恭敬，    由近下欲故。  
师见去至此，    为彼之所轻，  
速疾致疾患，    以是致命终。  
若男女非道，    二俱不亲近，  
是女所不喜，    云何当犯是？  
若有屠牛处，    一切不往彼，  
此非我所宜，    菩萨法如是。  
如是诸过患，    佛悉皆知之，  
是故不正行，    今为如实说。」

佛如是少说，    我声闻能知，  
斯于佛面前，    云何所后虚？  
众生信圣者，    欲疾至涅槃，  
为是故我说，    不为难教者。

「复次，迦叶！在家菩萨应成就三法。何等三？居住家中犹如客使不起我想，若已施者起集聚想、其未施者远离于我千由旬想，不为子息作于藏举宝藏之想。迦叶！在家菩萨应当成就如是三想。」

而说颂曰：

「当修习死想，    我不久命终，  
是故诸所藏，    此财应修坚。  
为别男女事，    终不为利是，  
速疾求坚法，    身命及财物。  
殷重欲菩提，    所作不轻躁，  
为求法利故，    一切时摧伏。  
犹如小女戏，    亦如光渐现，  
不乐着于味，    欲法者如是。  
读诵不休息，    善好法庄严，  
其难可修集，    于种种诸众。  
如是相似法，    迦叶我已说，  
其有聪利者，    我悉知是人。  
彼知己解了，    自怜愍于己，  
是人于彼时，    数数与我对。」

「复次，迦叶！在家菩萨成就三法，不退阿耨多罗三藐三菩提。何等三？父母不信化令住信、父母毁戒劝令住戒、父母悭贪劝令住舍，叹无上道，在大众中而演说法。是名初法在家菩萨不退无上正真之道。复次，迦叶！在家菩萨应当善知可供养者及不可供，若知是已，诸可供者而设供食，不可供者而不设供，于是人所应修慈心。迦叶！是名第二法在家菩萨不退无上正真之道。复次，迦叶！在家菩萨所有财物勤苦集聚，是不应失，不令尽失，不施于他，坚藏牢举施住净戒沙门、婆罗门，平等封邑，财封无系一切净行。迦叶！是名第三法，在家菩萨不退无上正真之道。」

而说颂曰：

「若在家菩萨，  
生起三种慧，  
若父及与母，  
劝之令生信，  
慳犯住戒舍，  
向无上菩提，  
若去至四方，  
应行于法施，  
犯戒教住戒，  
无慧者教慧，  
若见慧比丘，  
恭敬信近之，  
所以近比丘，  
速疾受其法，  
彼觉智增益，  
觉智增益已，  
是有信解相，  
不以不信心，  
渐渐见增益，  
于是诸增益，  
知是增益已，  
心喜而趣向，  
随所有财封，  
诸有持戒人，  
是无有异语，  
健勇进坚施，  
柔和易共住，  
欢喜而坚舍，  
勇健上施主，  
众施中最健，  
若金银及钱，  
悕望于上法，  
一切天及世，  
若求于法者，

集无上菩提，  
以学无上道。  
恶慧无有信，  
令趣向胜法。  
无慧者信慧，  
劝令至是处。  
求善说法者，  
以增益智慧。  
无信者教信，  
是人终不退。  
持戒多闻者，  
数数而咨问。  
数数为咨问，  
是故不退转。  
闻处及智者，  
舍己肉供养。  
如我之所说，  
能趣向菩提。  
速疾得增长，  
彼得不为难。  
若自及与他，  
是人增益智。  
本所聚集者，  
一切以置前。  
终不说异言，  
是能成如来。  
勇健者得慈，  
如先后亦然。  
不从他所求，  
一切无不舍。  
本生亦曾施，  
甚深最上句。  
相应专供养，  
悉应供是人。

勇健者集法，    以法而活命，  
有智慧胜法，    当为救世者。

「复次，迦叶！在家菩萨有三法，发阿耨多罗三藐三菩提已，疾堕声闻而般涅槃。何等三？若暂一发菩提心已，怖畏地狱、饿鬼、畜生，于是菩提道起重担想，求诸善根，不专思念，不好善求，是人于于心意所害生起苦想。迦叶！是名初法在家菩萨退无上道，疾堕声闻而般涅槃。复次，迦叶！在家菩萨若暂一发菩提心已，若行施时，瞋恚而与，与已生悔，是人不能至于佛智。迦叶！是为二法在家菩萨退菩提心，疾堕声闻而般涅槃。复次，迦叶！在家菩萨若暂一发菩提心已，不勤精进，集于多闻，是人以是少许善根速入涅槃。迦叶！是名三法在家菩萨退菩提心。」

而说颂曰：

「发菩提心已，    而不修正行，  
毁坏于佛乘，    堕在声闻乘。  
菩提非不信，    及懈怠者得，  
慳贪无智慧，    是等作障碍。  
知恩住净戒，    心常乐行舍，  
舍时心欢喜，    菩提不难得。  
心造作诸恶，    心亦能行施，  
是众生心坚，    当作世间塔。  
若不舍是法，    心趣向菩提，  
当作佛出世，    为世作福田。」

「迦叶！在家菩萨有三法退菩提心，堕缘觉涅槃而般涅槃。何等三？是在家菩萨一发心已，恠惜秘法。迦叶！是名在家菩萨初法退菩提心，堕缘觉涅槃而般涅槃。复次，迦叶！在家菩萨一发心已，恠望良时，求觅吉日。迦叶！是名在家菩萨二法退菩提心，堕缘觉涅槃而般涅槃。复次，迦叶！在家菩萨懈怠、懒惰，不勤求助菩提之法。迦叶！是名在家菩萨三法退菩提心，堕缘觉涅槃而般涅槃。」

而说颂曰：

「恠恠惜秘法，    不教诲他人，  
当堕缘觉地，    是退失菩提。」

是退堕于三，      失利有苦来，  
去已而现在，      是疑于菩提。  
思惟大乘已，      速悵望吉祥，  
此非信解相，      佛不亲近是。  
若有极专心，      坚求菩提道，  
此不礼事余，      唯除世间塔。  
若有是信心，      不得其余天，  
是成就最上，      名为天中天。  
生菩提心已，      是不礼事余，  
是有最上色，      在在所生处。

「迦叶！在家菩萨有三法得身极黑。何等三法？断佛塔中所然灯明，他有鬪诤生瞋恚心，不豫已事代他诤讼，见黑色人而形眚之。迦叶！是名在家菩萨三法其身极黑。」

而说颂曰：

「塔中然灯明，      断取是光明，  
其身极甚黑，      犹如黑漆盘。  
见黑人形眚，      我白汝极黑，  
是轻毁他已，      受身黑如炭。  
善守护口业，      作业终不失，  
随如所作业，      当有如是器。」

「迦叶！在家菩萨有三法生工巧家。何等三？迦叶！在家菩萨自受五戒，若有知识从远而来，与酒令饮，或请余人饮之以酒。迦叶！是名在家菩萨初法生工巧家。复次，迦叶！在家菩萨自持净行，和合他人令行欲秽，以此业故生工巧家。迦叶！是名在家菩萨二法生工巧家。复次，迦叶！在家菩萨若见他人营造法事，勤读诵者，然是人者，欲造天舍，而是菩萨语此人言：『汝舍读诵营造所作，作已还读。』以是业故生工巧家。」

而说颂曰：

「以酒请他人，      及与己知识，  
以酒为上供，      是业堕工巧。  
不能作刀针，      及诸工巧事，

唯能坐地已，	手执捉排囊。
自己舍女人，	向他赞淫欲，
以是业报故，	生堕工巧家。
不能作刀针，	不知鼓排囊，
教令执捉椎，	以锻于钉铁。
以此障碍法，	令他舍法故，
堕在工巧家，	此人生是家。
彼不见排囊，	亦不见椎钳，
悉破坏众器，	其业报如是。
迦叶！护口业，	亦护慎心业，
一切不善法，	不向他人说。
生死受众苦，	生已增长爱，
是故勤行法，	舍诸不善法。

「迦叶！在家菩萨成就三法，生在王家，颜色殊特端正可爱、鲜净红白，而不懒惰、聪黠明了。何等三？迦叶！在家菩萨覩未曾见沙门、婆罗门，若其见已，生信敬心：『此是福田，此应供养，此应礼敬，此是福田。』生信敬已，请与衣服、饮食、卧具及诸病药。迦叶！是名初法在家菩萨生在王家。复次，迦叶！在家菩萨坚住本誓，住本誓时，如说而住，终不妄语。迦叶！是名二法在家菩萨生在王家。复次，迦叶！在家菩萨于住净戒沙门、婆罗门所，亲近咨受修于坚法。迦叶！是名在家菩萨三法生大王家。」

而说颂曰：

「慧者见已知，	净戒多闻者，
是起如是心，	往彼请命之。
彼既请命已，	如实而施作，
是不为涅盘，	所施无所害。
是取于坚法，	如所亲近者，
种种智增益，	速疾获难得。
如斯之信心，	趣向菩提者，
得菩提不难，	如智者行处。
最上活命已，	舍最上财封，
集聚上妙法，	证于最上灭。
是人生上族，	是有上妙色，

服上妙衣服， 获最上涅槃。  
知于如是法， 有智智慧人，  
修行无怯弱， 如佛之所说。  
志趣向胜乘， 是人到胜乘，  
灭一保证使， 如彼最上果。  
如所造作业， 果报亦如是，  
终始不败亡， 经百千亿劫。

「迦叶！在家菩萨住在家地成就三法，种是善根，终不受于五欲之乐，乃至得于无上正道。迦叶！是在家菩萨受持五戒，不向他人赞五欲乐，不诱引女人，勤修自业，起如是心：『我今不当亲近女人，此终不欲五欲之乐，乃至得成无上正道。』迦叶！是名在家菩萨初法，终不受于五欲之乐，乃至得成无上正道。复次，迦叶！在家菩萨若闻是等甚深经典净信修习。迦叶！若是深经至于非器，彼应劝进。迦叶！若善男子，能令他人舍离疑心，而是菩萨以此善根，得无碍辩，得不系辩，生及命终，速得见佛，既命终已，得生天上，不久当得阿耨多罗三藐三菩提。迦叶！是名在家菩萨二法，乃至得成无上正道，不受五欲。复次，迦叶！在家菩萨所有善根，皆悉回向无上正道，不乐色声香味触法，不乐财封，不乐自在，不乐眷属，无漏之心、无漏果报，速成阿耨多罗三藐三菩提，不受五欲乐。迦叶！是名在家菩萨三法，不贪受于五欲之乐，乃至得成无上正道。」

而说颂曰：

「在家持五戒， 护持善守护，  
离亲近女人， 轻毁斯下处，  
如是相似法， 修集无漏足。  
若有疑惑者， 教令速解了，  
一切诸善根， 悉回向菩提。  
以此诸善根， 速舍五欲乐，  
常有于多闻， 为众生说法。  
生起大悲心， 求于菩提道，  
是故闻是已， 生贤善妙欲，  
终不亲近欲， 速疾转法轮。」

尔时，大迦叶白佛言：「世尊！今此经法以何名之？我等当共而奉持之？」

佛告迦叶：「是经名曰“演说三戒”，亦名曰“说菩萨禁戒”，亦名曰“集一切佛法”。」

佛说此经已，大德摩诃迦叶及诸大众，天、人、阿修罗、干闥婆，闻佛所说，皆大欢喜。

## 大方广三戒经卷下

---

【经文信息】大正藏第 11 册 No. 0311 大方广三戒经

【版本记录】CBETA 电子佛典 Rev. 1.24 (Big5)，完成日期：2009/10/19

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，西莲净苑提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---